

Sasterawan Jamal Ismail terima Anugerah Tun Seri Lanang

► IRMA KAMARUDIN
irmak@sph.com.sg

Tokoh sastera Melayu mapan, Encik Jamal Ismail, dinobatkan sebagai penerima Anugerah Tun Seri Lanang – anugerah paling berprestij persuratan Melayu Singapura – di majlis Anugerah Persuratan 2023 pada Sabtu.

Penulis cerpen dan novel berusia 71 tahun itu turut membawa pulang Hadiah Persuratan dalam kategori novel bagi bukannya yang berjudul *Mustafa: Epik Kerohanian Seorang Kiai*.

Encik Jamal, yang sudah berkecimpung dalam bidang penulisan selama lebih lima dekad, melahirkan rasa syukur dan penghargaan kepada semua pihak yang telah memainkan peranan penting dalam perjalanannya.

“Anugerah ini adalah pengiktirafan yang besar, dan ia bukanlah hanya milik saya, tetapi milik kita semua yang telah bersama-sama membentuk gerakan persuratan baru yang lebih progresif dan relevan bagi semua.

“Pertama-tama, saya ingin mengucapkan ribuan terima kasih yang sebesar-besarnya kepada keluarga saya. Mereka adalah sumber kekuatan, sokongan dan inspirasi saya,” kata beliau.

Encik Jamal turut mengucapkan terima kasih kepada rakan-rakan pejuangnya dalam gerakan persuratan.

“Bersama kita telah bekerja keras untuk menggerakkan perubahan dalam dunia kesusasteraan Singapura. Kita telah berusaha bersama untuk menjadi ‘khairu ummah’, dalam konteks ini, membentuk sebuah komuniti yang bersatu dalam visi untuk mencapai kebaikan kolektif,” kata beliau.

Selain bidang penulisan, Encik Jamal juga aktif dalam bidang penyiaran sebagai penulis skrip televisyen, sutradara, penerbit eksekutif dan penerbit rancangan drama dan dokumentari.

Antaranya, beliau pengarah drama *Ba-ra* yang mengisahkan tentang kehidupan sekumpulan remaja di politeknik – antara drama Melayu tempatan yang popular

dan masih diingati ramai hingga ke hari ini.

Anugerah lain yang pernah diterima beliau termasuk Anugerah Loheh Noor dari Kementerian Penerangan Republik Islam Iran pada 1997 bagi dokumentari Islam.

Di seberang Tambak, antara lain, telefilem *Ilham Suci* pimpinannya pada 2005 berjaya menjadi finalis Anugerah Skrin TV3.

Anugerah Persuratan 2023, satu acara dwitahunan anjuran Majlis Bahasa Melayu Singapura (MBMS), mengiktiraf penulis tempatan dalam bidang persuratan Melayu. Ia juga bertujuan untuk menggalakkan penerbitan karya bermutu, serta me-

nyarakatkan bidang persuratan.

Tahun ini, acara diadakan di Muzium Tamadun Asia (ACM), dengan majlis diserikan kehadiran tetamu terhormat, Menteri Perhubungan dan Penerangan, Cik Josephine Teo.

Turut hadir ialah Encik Mohd Fahmi Aliman, pengerusi MBMS, dan Dr Azhar Ibrahim, pengerusi Jawatankuasa Persuratan MBMS, yang juga merupakan ketua penilai bagi Anugerah Persuratan.

Sementara itu, Encik Muhammad Khairool Haque Abdul Kadir, seo-

rang penulis dan penuntut di Institut Pendidikan Nasional (NIE), pula dipilih sebagai penerima Anugerah Harapan.

Jejaka berusia 31 tahun itu juga menerima Hadiah Persuratan bagi kategori sajak untuk bukannya bertajuk *Anak Waktu Belajar Diam*.

Dua penulis lain turut menerima Hadiah Persuratan – Encik Farihan Bahron bagi cerpennya berjudul *Kepala Kotak*, dan Cik Raudhah Alias bagi karya sastera kanak-kanak bertajuk *Feri Menjaga Kelestarian Laut*.

Untuk edisi anugerah kali ini, Hadiah Penghargaan turut diberikan kepada dua penulis dalam usaha menggalak mereka terus berkarya dan menghantarkan karya-karya mereka untuk dinilai.

Mereka ialah Encik Anwar Hadi Ramli bagi drama untuk pentas, *RASAlah*, dan Cik City Mazita Maswadi bagi esei/kajian sastera berjudul *Jervoisku Meniti Masa*.



PENGIKTIRAFAN BESAR: Penulis cerpen dan novel mapan Singapura, Encik Jamal Ismail, dipilih sebagai penerima Anugerah Tun Seri Lanang di majlis Anugerah Persuratan 2023 pada Sabtu. Beliau juga mendapat Hadiah Persuratan dalam kategori novel bagi bukannya yang berjudul ‘Mustafa: Epik Kerohanian Seorang Kiai.’ – Foto BM oleh NUR DIYANA TAHA